

*Bida di baby y di adulto el
a yega di scapa*

Despues di 31 aña Seour Eugenia ta despedi

ORANJESTAD(AAN)--

Durante 31 aña y 9 luna, el a traha na Aruba. Promer el a traha na Hospital pa 17 aña pa despues entrega su forzanan na Wit Gele Kruis y especialmente San Nicolas. Awor Soeur Eugenia mester despedi lagando atras labornan enorme, cu tras di cortina a tuma lugar.

Hopi cos a pasa den e tempo cu Soeur Eugenia a traha na Aruba. "Mi a mira desaroyonan. Tempo mi a cuminza ariba burico nan tabata bay dokter," e ta splica DIARIO. Awe Soeur Eugenia ta bandona Aruba despues di hopi aña di labor, cu hopi biaha a bay sin e asistencia di equiponan moderno cu awe a concoci.

El a mostra DIARIO cuanto cos a cambia. Mundo medico a conoce modernizacion y expansion enorme. Onderstand a pone fin na hopi miseria cu tabata reina y awor por lo menos esnan cu no tin entrada por conta cu algo di asistencia. Pero un tempo tabata tin hende sin ningun forma di entrada.


"Mi mester a traha cu alma y culpa", Soeur Eugenia ta bisa, ora e papia di e labornan cu e mester a desplega. Labornan cu a haci cu e no por a sinta warda te ora hende bay cerca dje. Hopi biaha e no tabata warda pero na momento cu e nota cu den un familia algo tabata bay

malo, e mes tabata presenta.

Asina el a yega di yuda salba hopi bida. Especialmente babynan, cu awe ta hende grandi, tabata tin mester di asistencia di Soeur Eugenia, un enfermera di alma. Un biaha un mama no a ripara cu lombrishi di un recién naci tabata crece bay paden, loke tabata un situacion peligroso. Soeur Eugenia a actua di biaha y a scapa bida di e mucha.

Tabata tin casonan di aduhtonan tambe, cu pa temor pa dokter mester a conta cu su sosten. Den un caso tabata tin un señora cu heridanan grave na su pia. Mediconan kier a amputa, pero e señora mes no tabata kier. El a haci un apelacion ariba Soeur Eugenia, cu durante dos aña a trata e heridanan, cu a bin seca.

Awe Aruba mester despedi di Soeur Eugenia, cu na Hulanda mester bay entrega su mes na otro tarea. Su orden religioso a haci un apelacion ariba su persona pa bay yuda den cuida paramedico di soeurnan di paisnan manera Africa y Brazil, cu a bira bieu y awor mester asistencia na Hulanda. "Cu mi 68 aña mi tampoco ta joven, pero mi ta bay yuda", Soeur Eugenia a bisa. Pero e lo bay cumpli cu su encargo lagando atras na Aruba e saber, cu un dia tabata tin un Soeur Eugenia, cu awe hopi ta yama danki pa loke el a haci.



Construccion di fase 3 di Dutch Village ta parcialmente cla y lo ta completamente cla pa December 15 1988. E complex di Dutch Village lo ta consisti di 27 apartamentonan luhoso cu bañonan "Jaccuzzi", television cu satelite antenna, cushina full equip, mueblesnan Mexicano, artenan Haitiano, y camanan king size. E tereno rond di e complex tambe lo haya un bunita decoracion y tambe lo inclui un zwempool. Ariba e foto por mira Sr. Gerrit Griffit y Al Kunsher miranda riba e plannan di construccion.